

四庫全書

集部

欽定四庫全書

集部

粵西文獻卷六十六

詳校官庶吉士<sub>臣</sub>瑚圖禮

主事銜<sub>臣</sub>徐以坤覆勘

總校官庶吉士<sub>臣</sub>朱鈐

校對官中書<sub>臣</sub>王鍾泰

謄錄舉人<sub>臣</sub>劉禮

欽定四庫全書

粵西文載卷六十六

桂林府通判汪森編

傳

名宦

于範嘉靖初知潯州府剛明正直折獄如流興學校肅  
官常聲名揚著

李景元侯官人進士嘉靖元年南寧知府興學造士惠

政及民士民德焉

華愛字仁卿櫟陽人正德甲戌進士嘉靖四年出守桂林民獷而好訟充斥於獄有久繫不決者君聽微析疑窮日力不懈浹旬囹圄為空時田州岑猛梗王化督兵征勦檄軍餉者絡繹乃早夜區畫與民裁濶狹輸餽每為鄰壤先秩滿以最復舊任竟以直道忤人卒被劾落職

劉士奇順德人舉進士嘉靖七年知梧州府仁明廉恕

庭無留獄惟恐傷民郡故多竹舍久則燥烈火患士奇  
出帑金為民砌魏牆十餘堵以避火吏收支多侵牟奸  
公為正法焉後按為格刊定性書以示多士有盜藏錮  
者訊不伏士奇索錮得之其摘伏類如此覲行民餽土  
物悉屏絕累官山東布政使

喻義無錫人進士嘉靖十二年南寧知府律已廉慎門  
無暮金剖決公明不以豪權有所挂抑仁恕藹然士民  
咸稱長者任三年致政歸

林廷杓閩縣人嘉靖十三年知慶遠府鎮靜清廉民不擾而治日起土酋餽金帛堅拒不內由是畏威懷德歲輸惟恐後期賑饑禮士繕城教蠶歷九載始終一轍撫按交薦之而以乞休去民立祠祀之

王橋京山人進士嘉靖間慶遠知府議立千蔓落黃斷灘等堡江道稍戢

朱鴻漸吳縣人舉進士嘉靖十八年知梧州府出納必親奸無所售羨餘悉歸公帑往官買於民價不償直鴻

漸著為禁與民平價修葺學宮躬勤課講王師平交南  
過境注措有方民不知兵以艱去行李蕭然民今思之  
累官福建布政使

朱黼吉水人舉人嘉靖二十年由南京監察御史出知  
南寧府政持大體興學右文振作士氣郡邑中有弊政  
悉釐革之民心嚮慕

曾雲太和人舉人嘉靖中慶遠知府蒞任三年廉以律  
已簡以臨民飾吏治以文章撫卹民以德化入覲竟浩

然歸撫按薦留之不起

秦檜無錫人嘉靖中知慶遠府計除大寇韋啟邦覃萬  
貴遠邇快之

王貞吉泰和人嘉靖間為潯守英敏豁達治政之餘多  
所營建尋以能調補南寧

翁世經福建人嘉靖二十四年知梧州府治尚節簡約  
已裕人加意學校砌理街道修府庫築火牆立三關塞  
蹊徑百廢具舉秩滿去闔郡思之

張元藩山陰人由官生嘉靖辛亥以後府經歷知平樂府時猺獞竊發兵餉不支剿撫無定議元藩與僉憲茅坤謀定鵬剿之策賊首莫良三藍孟乾等次第就縛闔郡晏然癸丑計竣還里引疾不出

王三接字汝康崑山人進士嘉靖間累官柳州知府甫至柳張襄惠公岳已平馬平寇行相地得千壤村為要害議創堡塹調狼兵雜他獞守之以控御遠邇公抗議謂巨憝頃已悉伏誅其脇從解散者良赤子也墳墓廬

舍妻子皆在今奪以予戍卒則亡所歸使雜居必不安  
且狼兵非能久戍人也是不潰歸必四出行剽耳項守  
使人微風諸獍其父老攜其稚弱踵至叩顙願歲歲共  
縣官賦役自詛於天不敢倍德守請毋以狼兵雜他獍  
戍之即以土著之獍戍之張公曰善罷不復別置戍時  
又有周王諫者其父子皆賊黨據上猶尚行剽柳融四  
邑君設方略捕擒之柳故環江而城阻水為固惟北則  
平野無山谿之險有寇警則豕突而前不及乘鄣公請

於張公闢北郭而城之其長為丈者五百七十有奇高  
為尺者十有四

王汝奇字薦甫豐城人補博士弟子入太學累官廣西  
太平府通判假守事太平地絕遠諸屬州都結萬承全  
茗陀陵思同皆土人狡焉思啟封疆相尋於戈盾君謂  
毋恣臆三尺閣女頸不貸女有所部按情實立剖諸酋  
吏惴惴赴府受約束君修功令創馬貢議折賦清編冊  
郡人歌之曰天畀使君以蘇我人胡不即真君念其父

母年老移疾乞歸

劉教廬陵人舉鄉書嘉靖三十二年知梧州府博極羣書精於理學覲行即致政去

方大樂嘉靖末知潯州府直朴清介有長者風絕逢迎息訟獄郡中無逋邇胥戴未幾卒

陳大濩字則殷古縣人進士嘉靖間思恩同守思恩故厓地十歲九反前後游宦無任行者公單車往至則攝郡事城故無井公乃闢水關引溪流入之民以無憂汲

又築菴廬六十楹於睥睨間以棲直者公以王文成故  
法撫諸蠻咸自縛請降誓不復叛復攝橫州橫亦治而  
公以倦遊投劾歸

趙遠永寧衛人嘉靖十五年任桂林同知僅攜二僕之  
官政嚴吏肅喜讀書稍暇即手一卷披覽嘗隆冬就爐  
火散其袍不知也嗣後惟火袍視事卒莫能更為同僚  
所忌調簡去人惜之

劉時舉銅仁人舉人嘉靖三十四年平樂府同知忼慨

有大略尤長於用兵時有征剿多其贊畫暇時集諸生講經義嘗修明賢書院以居士又置學田贍士之貧者郡人誦之初時舉年十三從父仁之梧州父道卒舟過府江徭賊卒至庶母二妹死焉時舉繫入峒中竟用計脫歸銅仁薦於鄉來官府江人以為異語

程文嘉靖間通判潯州廉明有為人莫敢欺履任不攜家屬征峽寇領兵直入賊巢士莫不爭先得奏功抱病還卒無以為殮當道遣官護櫬還鄉

李鵬舉歸善人舉鄉書嘉靖三十九年判梧州總糧行古學博政務嚴明人不敢欺革倉宿弊解戶無虧公暇進諸生講心性之學容縣置學田拓衙宇百廢俱興署懷集化徭剗强策事悉中機宜

陸敷錫字得承別號鳳塘嘉善人補邑弟子員以例入太學嘉靖中累官判柳州柳民蜚繡錯而居獷悍難治公申明約束與之休息羣夸相戒不入境嘗攝柳刺史柳俗好訐吏往往文致傳爰書公廉得狀白恤刑使者

多所平反先是郡長吏入覲州縣具錦罽刀布以供享  
覲公當攝行曰覲吾職也奈何脫民以行私乎悉謝不  
受後署賓象兩州事象有安仁土舍何公思等聲言花  
蘆古陳諸賊稔亂殃民願效死力為朝廷除患其實陰  
肆剽掠洛田陸弄間良民率被魚肉乃各鼓譟治兵相  
擊殺聚衆累萬人而公思等益招亡命所至焚剽勢張  
甚諸上官遣吏慰諭數四寇譁曰是謾為好言誅我耳  
必我信也須臾別駕來上官頗難之公毅然請行遂單

車往兩寇望見公各釋刃羅拜歡呼震天公獨坐公思  
開勞罪而令餘黨悉解去象州以平公在賓嘗夜詣郡  
遇賊將圍城計且擁公以質公瞋目叱之曉以大義賊  
衆披靡黎旦稍稍引去屬大兵征懷遠公預選壯士習  
水戰者二千人以須徵發俄而檄果至即赴援復調度  
運餉不絕懷遠之捷公與有力焉永福江道為兩江咽喉  
賊出沒其地公議置餘皇扼隘道令壯士五分夜擊  
刁斗賊不敢近而遷江柳城間王新建所復斷藤八寨

皆為巨賊逋數公相要害上幕府移置衛所凡一十有九由是諸賊失據枹鼓希聞公念母氏竟掛冠歸

徐南金字體乾豐城人嘉靖二十一年桂林司理英敏疑重靖江諸軍校熒惑王聽錢侍御喋捕置之法其黨或遁或匿錢去後又還府惡氛熾甚南金廉其狀遣官卒就府中縛出以狀列奏命刑科給事王國楨刑部員外張祉錦衣衛千戶某按其罪株連逮訊府中官校為之一空三使歸覆奏報下侍御朱有孚枷其黨露立市

踰日死自後無敢指稱侍衛親近陵暴其國人者

劉方興吉水人舉人嘉靖二十三年任平樂推官慈祥愛民時議剿上下水七十二村興不奉命力阻其議民至今德之

郭仁龍溪人歲貢嘉靖初為梧府訓素行廉介同郡人林潤客於梧病篤以金二百屬仁治後事餘以謝林卒仁捐已金為治棺殮殯寺後募僧守之明年仁病且瞑急命其子薦以林所屬銀寄官庫封識宛然督撫林富

義之為表其墓

林昭廣東人監生嘉靖十五年南寧府教授勸誘青衿  
教事修舉持已接士忠厚老成士心翕服致政歸

孫寬晉江人監生嘉靖間南寧府訓導簡重不立城府  
學古居官於紛華勢利泊如也致政歸

盧定莆田人監生嘉靖十五年南寧府訓導教士隨材  
造就不以寒暑有所變更士子誦其學之富教之勤云

邱雲霄崇安人以歲薦嘉靖二十五年

闕二

府訓導學

問該博督學謝汝槐檄修省志擢國子典簿令柳城縣  
所至有聲嘗著止山集尺牘抄行於世

石銘長樂人舉鄉書嘉靖三十六年署

闕二字

府教事標

經史大義迪諸生絕不與戶外事尋卒督學陳善治躬  
祭其柩曰才足以仕而不利其官德足以壽而不永其  
年已焉哉夫固命之窮也已

陳世瞻峽江人監生嘉靖十三年知上思州加意學校  
治闕梁建譙樓坊表草創州志以道率民民始駭之繼

擾之而終安之也後遷長史

謝澧閩縣人嘉靖十三年永安知州在任五年時數有邊警澧勵兵固守請鑿五屯河貿易魚鹽至今賴之  
駱惟儼嘉靖間知鬱林州推腹愛民築陂捍城新學舍  
造士類皆政之大者民久而愈思

周璞福寧州人舉人嘉靖二十三年知上思州蒞政廉  
明興廢救弊民甚德之後陞思恩知府

王時中閩縣人舉人嘉靖二十六年橫州知州存心愷

悌政尚廉平體順民情有可行者輒舍已從之斷獄多從寬恕作興士類每月發燈油錢一千二百文以給之又撥民人莫時秀告退無糧田租三十三石入學以助士子公派及錦帳之用後歸養不出

王濟字伯雨烏程人太學生授廣西橫州判官橫會缺守州政多弛盜且作君視篆得其習俗利弊凡所設施咸與橫宜橫俗丕變盜亦潛弭州以無事君退食之暇植湘竹盈庭吟咏其下采其風土物宜與域中異者類

為一編曰君子堂日誦手鏡遠近傳之

顧起綸字玄言無錫人累官貳鬱林守行守事嘗條五  
便上之州黑青起公矢於神已竟寂然陸川寇來侵公  
勒習射士馳徵之殲其酋渠二十餘餘皆散走督府奉  
大司農檄徵丹砂於鬱林公為言鬱林故不產丹砂得  
非由葛洪求勾漏令誤耶洪從鮑靚隱羅浮未嘗至勾  
漏得勾漏砂也竊聞辰實產砂請市之便督府不聽役  
徒三萬徧采砂鬱林不得久之竟市之辰以解而公遂

復奉貢砂役既竣事謝病歸

柯良晉潮陽人舉人嘉靖元年武緣知縣操守廉潔祿俸外一毫不私入庭有疑訟一訊立辨教育學士貧而  
有志者給以燈油錢士民稱之

黃瀚字德新澄邁人嘉靖二年知北流縣剛介不避權  
要邑為虐政所苦民多流徙瀚招來安集復業者數百  
人卒於官筐筭蕭然

廖文字宗道長汀人嘉靖二年任義寧知縣時值蠻賊

猖獗燒劫鄉村殆盡民不聊生文至詣問疾苦給牛種  
寬逋負通縣賴以存活及去任父老送之皆流涕

劉初字復善江西人嘉靖三年知陽朔縣立身高潔弊  
革利興禦賊有法保民寧帖民頌之

胡鶴字沖霄信豐人以明經嘉靖四年知永福縣政尚  
廉平茹蘗飲冰時犗賊倡亂公盡心禦侮以北城山高  
受敵同邑人張錦議請築城增高重建四門城樓於鳳  
山巔設倚雲城賊遂不敢犯

夏美字宗美慈谿人游郡庠援例入南雍嘉靖間貴縣知縣縣治故瀕江城郭湫隘學宮舊在郭外自內遷後久鮮科第公開拓舊址徙而新之士咸感奮自是科目彬彬有人龍山三里徭獐向梗化公為建三老給以法服申諭禮制遠近歸心遇徵輸以羊革裹糧相從邑中既駭且頌蓋前此未有也東橋顧司寇寄贈以詩有看取漢家循吏傳獨憐卓茂最知名之句任凡三年有土官陰伺之遂幡然歸次東津驛賦詩云雨霽東津日未

晡洗添新綠岸頭蘆而今歸買西湖棹不向潯江聽鷓鴣

吳世寶翁源人嘉靖七年宣化知縣簡重端慈政聲涌溢遠邇以行取去

謝樸任丘人嘉靖己丑宜山知縣言行謹信誠心愛民辛卯夏請入覲為當道所留吏部以後期去之民泣留若失慈母邑人進士張烜為記且有龍水遺愛詩集

劉怡黃陂人舉人嘉靖八年知富川縣時徭賦竊發當

事者以軍食詘乏憚於用兵徒事羈縻恪銳志滅賊議  
不廢糧餉募鄉落壯丁申約束嚴賞罰徭賊聞之震讐  
功未就而卒

王聰字達之善化人嘉靖十年知賀縣多所建置甚得  
士民心後擢倅廣平是年邑治產芝九本人謂聰遷官  
之兆賀令多不調調自聰始

蔡雨東莞人嘉靖十年以鄉薦知容縣修城池建文廟  
學舍官牆煥然一新

羅鑑字惟昭泰和人由蔭叙嘉靖十年知義寧縣興利除害均編徭役修理公廨嘗條具民情六事申請施行盖有心於民瘼者

彭時濟安福人嘉靖十一年知修仁縣縣介柳象間叛服靡常出城圍數武非挾戈矛擁什伍不敢往田土多蕪民懶耕作時濟多方撫諭乃教之藝植令民為保伍有事互應援終其任賊無近城掠者

李時敏汾陽人歲貢親喪廬墓六年以至孝稱嘉靖十

四年知靈川縣蒞任初梓忠孝婚喪四勸家給諷諭尤  
長弓馬時地方有警巡察境內盜賊屏息委署賀篆卒  
民哀思之

方鵬懷寧人進士嘉靖十四年永淳知縣性廉毅留心  
靖盜政暇親課諸生修學宮建書院百廢具興陞廣東  
僉事尋卒士民悲之刻木像祀於書院

蔡邦紀字修之海陽人舉人嘉靖十七年知義寧縣剛  
毅有執終始不渝立石門堡創三界橋征雞籠巢建旌

善申明亭初南隅書院皆禦暴安民勸俗養士之政任  
滿致仕

蔣曰旦字汝相大庾人嘉靖間以歲薦知武緣縣平易  
寬和濟以嚴猛有夸目王受者不法不悛君使人召至  
誠飭之受畏讐解衆歸業境乃靖有奸人造偽印圖入  
學事覺督學監司坐吏罪君廉得其實竟以吏罪罪之  
不貸軍卒月給餉前令容縱包領弊甚君痛革禁預示  
戒澤乃下究以父喪解去

黎伯興番禺人嘉靖間知陸川縣敦厚周慎為政廉平  
修理學校橋梁立里甲規則民甚便之

羅乾廬陵人嘉靖間知陸川縣剛明正直不畏強禦人  
不敢干以私作興學校士民德之遷肇慶同知

張瀾字道源膚施人歲貢嘉靖壬寅知靈川縣凡審繇  
役度地遠近順民情而叅酌之徵輸不給則以俸折代  
解聽民緩輸易買食貨一如市價兩赴覲隨送至全州  
者百餘人歸時至設帳自給其廉介如此

林天榮字仁卿宜賓人嘉靖二十二年知永福縣宅心平恕制事勤飭修學宮至捐俸以益公費蒞任七年始終如一後以詿誤在省士民就問者接踵於道既去尤思慕之

蔡儒馬湖人監生嘉靖二十七年知武緣縣存心忠厚平易近民有古循吏風民畏且慕焉

李文貴嘉靖間知賀縣勤以勵己嚴以教人率士攻舉子業勸賀人行文公禮人畏而愛之嘉靖乙巳因舊學

不利科目自捐金二百遷學宮於南門內玉虛觀地甲子科遂連發文魁士林德之

郭顯文泰和人嘉靖間承黃州時方士獻修煉術矯旨下黃州命建道宮顯文抗疏直諫謫吳川典史二十二年遷北流知縣釐宿弊行保甲盜賊屏息擢嘉興通判劉綯廬陵人舉鄉書嘉靖二十九年知蒼梧縣廉潔而嚴行之時民任館庫里甲之役蒼梧當孔道措辦無休日劉獨毅然絕交際即歲時於上官無私覲民稍獲蘇

聽斷明允不以權勢翫當攢造躬較版圖釐剔諸弊尤  
留心學校擢大理府同知

王鳳吉水人舉人嘉靖二十九年知懷集縣政崇大體  
治尚嚴明陞武岡知州

金傑湯溪人舉人嘉靖三十二年知富川縣時各源諸  
徭潛出為孽傑繕城練兵伺其發而剪之勞溪源撫寇  
作亂轉掠諸村傑定計深入直搗其穴賊大挫而遁自  
後諸酋不敢竊逞

楊鈞嵩明人舉人嘉靖三十五年知恭城縣時學宮頽圯士無居業祭則木主露立誅茅盛犧帛而已鈞請當道遷之是年向曦舉於鄉又豁逋糧議料價實政及民擢守永安州

陳泗崇陽人舉人嘉靖三十五年知荔浦縣廉靜有守寬惠宜民請省翠毛腴襖零陵香諸貢及議裁峰門南源二巡司人心德之

翁堯英字海門晉江人舉人嘉靖三十六年知懷集縣

葺學宮勤課士而舉子較多修橋梁塞陂堰而民利益倍陞北京太僕寺丞

李大有歸善人嘉靖四十三年知永福縣明敏果斷恒以節用為要於治有條於民無擾陞温州通判

段雲鴻嵩明人舉人嘉靖四十三年知賀縣治尚仁慈民有訟詞互為平釋損貲修學建橋朔望講書惠以紙筆歲終貧儒量為資助薪米士民感悅不忘

陳學乾潮州人舉人嘉靖四十四年知平樂縣以節嗇

振刷為治吏畏而民懷之諸所興作皆度財相時而後舉民不知役帑不稱詘

李衷同字子中東莞人舉人嘉靖乙丑知靈川縣操守甚嚴尤精于吏事聽斷各得其情性不喜趨迎每饋上官廩給惟蔬肉數事或勸以備物曰觸怒生謗不過去官止耳若求備妄取則討罪有詞矣時虎入城誓於神逐之虎負子夜出不復入歷任三年謫南昌教授士民無不嘆惜

王宗予字時行別號對泉以例入太學得滕縣丞藤民  
徭獐參半鈔略無已時公至汰守衛兵老稚者而日訓  
討之甲士咸有鬪色所封培堡七十區明斥堠譏出入  
徭恐終公之任無窺藤者視博白篆歲當賓興簡公受  
事有士人薄暮亟呼舉燭公讀其卷是宜在高第亟與  
之榜放其人名第五諸僚竊訝公知人尋以藤令入覲  
屬公視其篆訟者交譴於庭徐折以片言各厭其意頓  
首去而先是盜盜藤帑中金令坐禍公為築窟室署右

備盡輸攻墨守之巧吏民夜高枕無虞相與刻石頌功  
德復屬視興業篆妖民和義四郎者密邇大藤峽聲勢  
相倚公授計密擒之已屬公視北流篆數月博白父老  
詣臺使願再借公公於是復視博白篆博白學宮距城  
二里傾欹杖柱而已公遷之城中和廟貌為蒼梧諸縣  
道中觀矣還藤復視其篆當入覲公泣別諸吏民而坐  
事齟齬他上官中以蜚語遂落職

石汝礪南樂人嘉靖間任賀縣丞子身之官有清操善

騎射吏民多敬畏之。犛犛聞其名亦為斂戢。又加意學校取重士類。後以誣坐戍。竟得白。改即墨丞。

童良錢塘人。嘉靖二十五年武緣縣尉。諳經術。以緣飾吏治。

陳璇字治之。揭陽人。舉人。嘉靖十年任靈川教諭。登堂課士。無一日少輟。夜則鳴鐘講說經義。雞鳴振鐸率士蚤作。修建學宮。議毀淫祠。佛刹以增飾之。嘗捐己俸買地築屏牆於明倫堂前。自遷學後。科第始盛。擢松谿尹。

諸士立生祠事之祠在學左門人全賜有記

林從茂海陽人嘉靖十二年武緣訓導制行端慤訓誨有方生徒督入號房肄業作課每夜親出點視設大鍋煮粥至三鼓分送各號終始無怠士皆悅焉

吳子堅潮陽人監生嘉靖十七年宣化教諭德性醇懿好古多聞每升堂論學首先德行嚴義利之辨多有正言格論以啟悟諸生遇士有貧寒周卹無靳疾則親為餽藥死必慟哭嘗植松於東西齋日夕自灌以種樹如

種心而授學者以勿忘勿助之法嘉靖甲辰遷慶遠教授學中多士建植松亭鐫碑以識去思

陳說江西人嘉靖十七年永福教諭模範莊嚴不假聲色人自嚴憚之與諸生講論理學多所造就

張弼道州人嘉靖十九年司北流訓隆冬盛暑講讀不輟卒于官

薛一經福清人嘉靖二十年任興安教諭善誘士類甘淡薄不苟取卒于官囊無餘金

吳必學字以思延平人以鄉薦嘉靖二十年署容縣教諭鑄文廟香爐置祭器立科貢題名於堂左右振作士風多所成就後遷知亳州士民懷之立遺思碑

梁佩高要人嘉靖間以明經授容縣司訓敦本實忘機械祭祀俎豆躬自陳設貧乏多周雖犯不校

鄧直樂昌人嘉靖二十八年永福訓導博涉淹貫率生徒講明性理士有貧乏者周濟之病者施藥以療之篤愛門人張守約謂必登科第已而果然人服其識鑒

張佐字瀛洲莆田人舉人嘉靖三十六年懷集教諭學  
優行修課士有方生徒德之陞荔浦知縣

王鉞直隸人嘉靖元年永福守備時賊勢方熾公多方  
計謀以剿平之由是種不陸梁民得歸田

劉經鄆陵人桂林右衛千戶初馮瑁死賊醢酒相賀曰  
老馮能再禍我哉未幾經出軀幹尤奇偉嘉靖十五年  
永福守備時古田賊莫振虎糾流賊而攻縣城公伏弩  
射斃賊首偽號戰江王者公邀擊之賊棄鎧伏山所獲

被掠人畜甚衆劇賊陸錢大輩覃扶稔朝獵為患甚虐  
公多方掩捕俘戮者數十輩黃類惡賊黃仁漢等劫掠  
殺人提兵一夕殲之威信大著令邏卒偵賊歸路要之  
十不失一取其酋磔之市次則剗其目今醜畏服如神  
陞永寧州叅將

張國威賓州指揮嘉靖二十六年守備永福是時七月  
賊梯北城劫庫竟遁去大岑賊韋公肖等發塚事露乃  
誘而擒其首從七人戮之徭獞款服

陳景超長沙衛人嘉靖三十八年永福守備時古田賊  
韋銀豹等越東城殺人行劫斬東門遁去後捕獲近賊  
莫平思盡斬之

金策柳州人嘉靖四十年永福守備時撞賊猖獗下台  
村莫金敗策計捕獲而戮之古底賊王朝猛劫藩司庫  
歸由東南木皮江策伏追之獲帑金數百兩又得印信  
一顆

殷正茂號石汀歙縣人進士隆慶五年巡撫廣西萬厯

元年古田蠻賊反公檄總兵俞大猷討平之奏改古田縣為永寧州設兵戍守乃建委官運鹽之議以其息充軍餉綜理詳密軍需賴以不匱仕至戶部尚書

吳善字元夫龍溪人嘉靖壬戌進士隆慶間古田賊平善以憲臣來撫之時諸徭新創永福古河毛峒及上宋等巖猶反側不靖善簡將繕兵殲其巨魁陸銀床莫良滿等散其黨羽權諸要害設營置堡以為長久計厥後柳慶北三北五之地煽亂三院亟檄善署柳慶事善以

偏師直抵其巢俘馘萬計自是不復為患仕終侍郎

霍與瑕南海人進士隆慶六年駐節左江以四都叛服不常致南太二府道路阻絕奏請於朝開建新寧州治州人德之建崇報祠設像專祀

鄭舜臣柳州知府其自敘云柳雖文獻之邦多為徭獞所據城外僅有民村三處各不滿四百餘人時督府殷公大征古田調狼兵十餘萬屯城下余內固城池外安兵衆晝夜不遑寧處狼衆各無統屬恃強聚夥搶擄姦

淫恣無顧忌民苦而訴之當事恐激變計無所出余不忍坐視乃進而謀於兵道密遣材官數輩禽四囚磔於市不書姓名各營自相疑阻其患遂息監軍道發俘囚數百名覆審內有幼者六十餘余憫其無知就死乃各易年歲而曲生之正擬修學養士清田權稅為百年計辛未春大計以閒住黜歸

林梓漳浦人舉進士隆慶五年守梧州歲荒賑禦有法民無死徙梧隸屬有三丁食故冗梓稍裁之官錢不靡

以艱去累官通政使

丘可封隆慶間潯州教授博究羣書勤於訓課修禮器  
正祀典大有功於風教擢國子監典簿趣裝蕭然

楊惟執揭陽人隆慶四年永安知州時高天賊黃功東  
作亂攻莫大嘉等堡伏山灣執惟執奪其印後贖歸惟  
執誓雪前辱具機宜畫山谷選嚮導剿滅之

鄧林材內江人舉人隆慶六年知新寧州詳請開廩三  
年兩貢如他州例州之人士得與歲薦皆公力

劉誥永昌人雲南解元隆慶元年知勅浦縣時古田未  
征寇盜充斥三崗為其肘腋誥撫以恩信嚴刁斗謹偵  
候練兵積粟賊覘其有備不敢犯陞武昌通判

陳一敬程鄉人舉人隆慶二年知永福縣慈惠恤民有  
善政聲時師旅煩興邑無加運誠為善於子民

蒲凝重南海人進士隆慶四年知靈川縣履任未閱月  
革蠹弊六事革火耗清濫免均紙剗禁雜派杜科斂省  
下程皆切民瘼性疎曠厭趨迎與諸生講論道德津津

然忘倦擢貳温州卒

傅大聘海陽人舉鄉書隆慶四年知蒼梧縣儉奉身勤卹民課農興學以忤當路去士民惜之

陳彬惠安人隆慶五年知荔浦縣輕刑薄賦不事邊幅淡若儒生荔民愛之時廖尙種黎朝罵等自相仇殺武弁邀功以叛聞制府議剿之彬力爭謂首事有主名不當焚及玉石議不合挂冠去征剿之事亦寢活者數千人

楊大韶建平人隆慶間任武緣令治尚嚴明減值錢以  
甦里甲置社學三十餘所立學田革包攬邑人稱快  
鍾昌東莞人進士隆慶六年知陽朔縣清白自持誓不  
苟取民有去思

蘇湖雲南泰和人舉進士隆慶六年知藤縣潔己愛民  
人號青天以艱去民為立石

鄭佐番禺人舉人隆慶六年知永福縣時大師之後公  
隨宜設防民種安堵修學校建城樓設堡目募耕兵庶

務多所經理

莊宇毅晉江人隆慶元年以明經授容縣司訓持已嚴正舉動足法庚午領廣西鄉薦除北流知縣

陶之欽字繼菴臨桂人舉人隆慶二年懷集教諭敦義以維士風明禮以端士習遷恩縣知縣

甘秉倫博羅人賀縣學諭教士必因其材而程督之出境從師者助以路費嘗手植雙桂於明倫堂前合抱盛開香馥滿城人稱之曰甘桂

俞大猷字志輔歷官泉州衛加右都督隆慶初古田煽亂督府薦公為征蠻將軍總兵官公至詢父老走古縣徑道及諸蠻砦喜曰蠻固易平也因為討賊議以進廷議避之中丞殷公屬以兵事公度地形險易及剿撫諸便宜無不中窾因計擒首惡黃朝猛韋銀豹等破東山淶里諸巢賊據山巔死鬪公陽分兵四出而陰遣死士從間道進賊墮崖崩壑無噍類擒斬七千有奇殷中丞上公首功陞資甚厚

康仁南丹衛人隆慶間永福守備尚氣節下賢諮策有  
儒將風從征古田引兵徇理定南鄉斬賊首首級四百  
餘顆師凱後邊山毛尚逋寇煽亂請留守州兵分道並  
進剿撫兼行纔四月諸谿洞悉平籍賊田就陂角大嶺  
立二大堡募土著仍招良徭以充實地方議徙雒容縣  
於理定首尾相為犄角雄才勝算動中機宜尋卒於官  
軍民舐犢莫不慟惜

吳文華字子彬別號小江連江人嘉靖丙辰進士累遷

廣西提學副使以粵俗撲開誘為詳萬厯間以右副都御史巡撫粵西方旱災流亡載道公疏請賑恤仍令人齎帑金乞糴鄰省稍儉常平法給散募民能墾荒者予牛具種子地利益闢饑而不害已乃覈田賦均驛傳飭兵戎疏設昭平縣建養利州學割武緣縣屬之思恩移兵備於鬱林增河池同知經略種種足規永利六平寨徭突出為患公檄叅政陳應春剿平之昭平賊首黎福莊父子聚眾剽掠執孝廉歐鳴鑾索贖聞公至懼釋之

會督府徵師討羅旁兵盡東公陰留三千人屬裨將韓文啟掩擊之斬福莊乘夜攻下五指白冒諸崗隨招撫餘黨二萬餘人即其地建營堡二十一得田二萬六千餘畝柳州賊北三聚黨萬餘人慄悍善騎射號剗馬賊諸將無敢嬰其鋒適河池晡咳有警公選卒七千餘裨參將王瑞倪中化往剿既得捷即馳檄諸將曰今河池捷北三必不我虞可擊也遂督兵分道進連破七十餘巢戊寅晉戶部右侍郎隨以太夫人春秋高陳情終養

母再踰歲乃逝服除起兵部右侍郎仍撫粵西相源熟  
徭苦催科謀為變公檄諭之遂定田州酋岑大祿與母  
梁氏不相能梁徙避他所鄰酋合聲罪欲瓜分其地公  
亟諭大祿迎母歸好如初覬覦遂息隨晉右都御史總  
督兩粵故事郡邑吏歲時獻遺稱觴上壽靡費不貲公  
一切禁絕幕府經用自軍市租及常賦以奉戰士其他  
權稅凡舶所入有司不敢問公悉歸諸官毫無染指又  
以其贏代保昌浮糧八十石民藉以甦轅門持戟之士

以數百計強半空名徵其餉充橐公悉按諸空名者罷  
勿餉其存者以隸裨將使訓習宿弊盡除歲乙酉淫雨  
沒廬舍城不沒者三版民號呼水中公親乘城集小艇  
渡之發倉粟哺被災者又請留餘金七萬餘以備蠲賑  
虔吉二郡改行粵鹽有議奪以予淮者公疏爭乃已粵  
人至今賴之

張任字希尹嘉定人萬厯六年以右副都御史巡撫廣  
西時十寨蠻獷競弗賓總督凌雲翼劉堯誨先後議剿

公為簡行伍申約束蠲逋賦發公庾斥貪墨吏士蒸蒸  
樂從明年搗其穴不三月悉蕩平又圖善後七策疏上  
下有司次第行之

郭應聘字君賓莆田人嘉靖間為南寧守累晉右布政  
忠州蠻黃賢相與思明蠻爭地公密授兵憲譚君計禽  
賢相轉左使中丞殷公猶古田寇諸所募畫率倚仗公  
未幾代殷公任公志清嶺徼首奏以忠州四都地建新  
寧州以終前功羅陽蠻韋金彪大剽近邑公復授兵憲

霍君計間彪之父若弟購彪急彪走獲之萬箐中府江  
尚徭數出江上公集土漢兵分水陸進討悉殲之復平  
懷遠諸叛徭拔巢壘百餘乘勝剿永福寇皆平之因上  
懷永善後十事上從之萬歷十一年為右都總制兩粵  
公閔兩粵疲於供億汰轄門冗員悉蠲津澳諸稅以利  
民粵人訥然若更生

顧鈴字朝肅仁和人嘉靖辛酉舉於鄉萬歷初巡按粵  
西粵西八寨故挾六十三山公披腹示土司無不願為

我奔走者因命為鄉導我兵隨而殲之不兩月八寨平  
凡省軍興萬計

鄭茂字士元莆田人萬厯元年府江兵備時高天古帶  
諸巢作亂茂督兵剿平乃於六巢各置一堡設兵屯守  
先是諸徭出沒勾劫官捐沖灘魚鹽之羨餘每歲犒之  
使不出而肆毒如故船非聚至百不敢發茂至即上書  
督府大集軍兵直搗其巢斬馘一千二百有奇以三崗  
改為二土司屯兵扼險開仙迴馬尾二營以通永安復

修廣運足灘二堡以控府江創昭平縣治以控平梧殘  
徭斂跡投款由是鹽艘不滯旅次無恐

錢立字守禮仁和人嘉靖乙丑進士萬曆戊寅以副使  
治兵永寧永寧徭獠地公謂不當繩以一切惟是蕩佚  
簡易寬其小過宜易為治適土夸爭田治兵相攻諸武  
吏競請剿公不聽檄諭以禍福皆羅拜惟公生死之公  
法其一二首難者餘置不問所全活無數

徐作南昌人嘉靖壬戌進士萬曆二年以副使兵備府

江時南源殘孽因碎江賊起復陰助之稽崗喇崙六窰等巢附焉圍張村據山灣永安路絕作督叅將王承恩分道進剿斬首二千餘級復峰門寨賊守山灣益固復命叅將王瑞攻克之周公樓等自縛詣軍門降昭平上下四屯巨賊黎福莊怙險為逆又計縛之上屯五指巖最負固正德間三征弗克作討平之後賊相戒無犯陳應春字汝和長樂人進士萬厯六年府江兵備副使時兩岸三崗八屯諸賊後先就平而樊屯獷悍如故乃

預設太平平安二堡移兵扼其要隘密授方略令把總  
楊榮撫民黎自新等計擒其酋廖公蠻張金祿等五十  
名縛赴軍門斬之調集軍兵進攻古連苦竹石鼓吊巖  
皆克之斬首二百六十級首賊覃萬祿等俱伏誅乃給  
榜宣諭聽其投款於是各縣巨酋如北陀黃連寶中屯  
黃公相李公義黃崗周平安通津韋扶求南源韋王七  
勢江俸百三相率來歸計二百三十七村五千一百九  
十六家男婦二萬二千六百二十八名口編戶輸賦若

齊民事聞擢右叅政兼僉事仍飭兵府江

周一經字子明貴溪人萬厯間備兵右江苗黃闖有脅  
力善騎射而涉獵文藝殺掠人無厭諸臺捕之不出田  
州今羅滿雷宗弑其主關紹盧佑兵滿萬口實吊喪進  
掠田州旋殺佑以州叛公環甲驟馬與叅將汪宏器采  
入其阻決旬斬關首縛其黨數百人督府陳公上功大  
司馬主爵以公貳苑馬卿

林士元萬厯間任廣西叅政學有淵源政多卓異理糧

餉出納稱平運籌軍需尤賴良法

范可奇會稽人萬厯甲戌進士十八年府江兵備副使  
飭吏治興學校禁賭風教藝麥時時按行州縣懲其不  
率者卒於官

周起元閩人萬厯間右江守道戊子歲大饑出穀賑濟  
全活者衆擒剿土寇民賴以安後劾逆璫死事

侯國治南海人萬厯初知思恩府恤民愛士首先教化  
政暇即進士子講授經義先是學宮建於郭外草創簡

陋且每河漲諸生病涉公捐俸遷學於城內府治之東  
規模制度一更而新之宣道化俗土風為之一變

羅黃裳高明人進士守平樂萬厯四年興府江道徐作  
計擒巨魁周公樓黎福莊等諸賊定上下四屯設兵防  
禦立寧化里以增國稅循良異政人稱曰羅父云

陸萬垓浙江平湖人舉進士萬厯七年知梧州府清慎  
下人政行慈惠興學育材一時科目稱盛府治大垓躬  
經始百度維新今口碑猶籍甚云

林喬楠晉江人舉進士萬歷十一年知梧州府清風蠹  
汰陋規以廉謹聞郡志火喬楠修復之擢本省憲副

郭鼎忠五雲人嘉靖甲子舉於鄉萬歷癸巳知潯州府  
潯郭外分兩河河分兩關商艘湊集故禁三日一放湍  
急舟擁人船俱溺公至弛禁不時啟關人貨兩完甲午  
六月旱魃為虐公請禱夢朱衣白簡神人來謁默示雨  
期滂沱周浹徭民雜處公戴星出入惜恤勤恤闔屬  
訟牒不苦析楊不苦贖鍰質成者累累公以此勞瘁伏

枕戴病赴覲至黃州劇

梁鶴鳴三水人萬曆二十七年知潯州府有德政

凌嗣音烏程人舉進士萬曆二十七年知梧州府清靜  
坦易當岑溪北陀大兵後兼助大工協貴餉中璫權稅  
上下皇皇而先事綢繆悉心裁節嗣音有力焉

陳鑑石屏人進士萬曆四十六年知梧州府甫兩月梧  
城大火城內外公私衙舍及城樓十燬八九焚死數百  
人民顛連露處鑑葛衣徒步逐戶詢賑行初秋烈日中

數日不興所賑以千餘計皆出橐中及借公帑時有乘機夜掠難民者捕獲以軍令徇民乃安是年粵西復大祲柳慶橫邕潯梧稻盡槁諸郡殍死相藉鑑發倉粟以平時價予民糴盡則轉糴東省以濟梧民得全闢梧陽書院選十屬生徒俊異者處之月加廩餼課其學業修護龍堤浚鱷魚池瀦蓄其水為學宮後莫築長堤障之濬濠導其水遠城經西門出於池於火山建真武祠以禳火患在任四年陞潯州分守道參政建祠祀之

丁自申字朋岳陳江人萬厯庚戌進士累官守梧州異  
時官市於民率倚辦牙僧償半直牙僧藉上官賦取民  
恒一而斂百公至勅有司平價貿易不得強勾奪民賴  
以甦梧交兩粵督臣開府其地守常為署輸納事一日  
狡匠入贖金數十鉞久之乃覺吏以白公公佯叱去之  
他日召諸匠領金自詣軍門諸匠悉至獨一人稱病不  
赴公召至詰責之曰贖金何為也匠叩首服時猺寇不  
靖會發兵大剿軍吏獲俘欲殺之公臨鞠止勿殺以俘

徧示閭閻其遺妻子事佃種者悉歸之所活甚衆居歲餘以親老歸養

林夢琦晉江人萬厯己未知南寧府時當大荒後公下車問民疾苦發倉賑濟是歲秋遂大熟性鯁介不畏豪蠹重恤鰥寡課士養民以援熙功陞左江守道

趙汝誼雲南普定人萬厯四年同知慶遠府事廉平自律正直不阿時藍龍返肆逆官兵剿之反逃長吏欲冒功塞責日肆蒐羅指赤子為俘囚冤號滿路公一日偶

會長吏適獻俘至公之皂隸亦在縛中公力爭幸免槩  
詢諸俘各出納糧帖以獻而死者幾及千人矣公引為  
己罪出示云本廳職專清戎擒獲有徑送堂者罪之一  
時稍寧不久以憂去民久而頌德

唐濟廉安遠人萬厯三十年以明經高等遷梧州貳清  
操勁節為當塗所器委署州署滕署北流皆有惠政剔  
蠹釐奸人不敢以私謁

林茂槐福清人舉進士萬厯二十四年司李梧州是非

立辨性嗜學手不釋卷進梧人士課藝多所成就

詹景鳳字東圖休寧人萬厯初判平樂府案往牒采風  
謠詢故老察民疾苦凡四十事以上臺司著為令郡多  
盜道梗申游徼逋邏之法偷魁就擒中涓開礦賀縣苛  
刻刺骨前後三令懼莫肯蒞職攝者視如死地涕泣求  
免臺司議必詹倅可往下車發邑乾沒庫金與中涓監  
奴匿推物者賀人踊躍相慶移攝梧州礦盜揭竿斬木  
一日而萬人烏集景詹單騎入其窟穴譬曉之衆皆叩

首棄仗誓不再反。猺獞為盜，聲援賁金錢，綵繒諸物，詣八洞號召。其酋長慰勞之，擇少年美姿儀識文字者，以鼓樂旗幟導而謁學宮，與衣冠俎豆之士相周旋習禮。容諸洞蠻聚觀，以為榮。回心鄉道矣。賈汪某行過富川，蠻奪數千金去。富川令不敢問，蹶躄六百里而赴愬景鳳。景鳳使洞主往諭，蠻縛盜自歸，未幾卒。

廖憲大田人。萬曆二年，永安知州。時諸峒初征，人懷猶豫。靡有固志。憲城社莫寨，以衛居民。會三峒殘黨復據

山灣密授部民覃滿者方略破之境內始平修署解建學宮纂州乘開支河功伐甚著擢惠州府丞

王之緒雲南臨安人舉人萬歷三年知養利州鼎建學宮重修州署革去小菜銀兩加意作人

葉朝榮福清人恩貢萬歷十一年知養利州甃石築城延師立社引水灌田革除供給有功德於民

汪鉉字舉之婺源人以邑學生入國子監就選為鬱林州同知署州事清戎平賦興學右文士民彬彬焉署藤

縣縣苦驛路衝繁公為之劑量豐約上下信之直指薦  
疏有曰志向不凡勤畏自勵又曰廉能譽著幹濟才優  
訟平而民心服吏肅而職業修

唐執中昆明人舉人隆慶初除修仁令值古田賊勢猖  
獗萬厯初方興師大創之當事者檄之至兩江佐軍需  
大軍深入轉餉無乏賊平留善後因晉縣為州當事者  
以執中親與行伍明習邑事遂遷為永寧牧是時巨賊  
雖已授首然諸種新附猶桀驁不馴或嘯聚剽掠發縱

殄滅更多方略凡城池公署修廢舉墜俱身任其勞且  
四境荆榛田野荒蕪執中又復里畝招集流亡而民皆  
安其業永寧故邊徼數十年不覩文教執中曰民不知  
義綏而化之此自今日首務乃白之上官設學校延社  
師選諸童稍秀者列之青衿時人比之文翁云任凡三  
年運籌決策動中機宜後轉郡丞去百姓攀轅誦其功  
不置

尹廷俊字位甫蒙自人隆慶辛未進士萬歷間知永寧

州當兵戈之後學宮弟子員俱寄空名居省會曾無鼓  
篳祠春秋者於是首創學宮日進諸弟子之秀者肄業  
其中一時士咸翕然向風州民故朴野為立鄉約朔望  
集老稚惓惓訓誨之三年之間刑清訟息復力白冤誣  
忤上官意竟以此得謫以憂去百姓思慕相與俎豆之  
張思中分宜人恩貢萬歷十三年知新寧州查渠吞等  
十六村原武黎舊地被江州侵去詳請院司復還編為  
六都新寧之有六都皆公功焉

毛鶴騰字翰伯博羅人萬厯甲午舉人知左州署崇善縣篆徙上石西州卒所至育士愛民謳歌載道

顏志邦字小山茶陵人萬厯間由歲貢累官永寧知州性明決雅操自持斥苞苴省冗費不私一錢寧人謂曰顏侯惟飲吾寧一水耳值久不雨志邦從里民數輩徒跣禱赤日中雨輒如注民歌曰此太守雨也諸僮婦多蓄蠱悉按之法其習遂除更加意學校慇懃造士以丁內艱去去之日行李蕭然惟書數篋而已百姓思之

朱點、溧陽人。舉人。萬曆二十八年，知新寧州。查糧羅十八村原係武黎舊地，尚在忠州。未吐申詳，三院復還新寧，編為七都州人請入名宦。

王泌興，寧人。貢生。萬曆四十四年，知養利州。引水灌田，修整廟署，惠澤及人。

吳尚倫，字覲揚，別號叙菴。萬曆間累官永寧知州。歲饑，發帑振瘠，設法招流民，賴以濟。

王一岳，字鎮甫，別號載南。連江人。嘉靖戊午，舉於鄉。累

擢廣西上林令單車入境宣德教拊徭獠俗雜男女擊  
砲倡和公厲之禁高城浚壕編保甲練土著以防戾種  
萬厯元年征古田洛容公督軍興事竟兩臺上公功天  
子賚公金如干是年徙守萬州上林人遮道留之不得  
乃醵金伐石紀公大政七碑豎上林治中六年遷思明  
府同知思明守世黃姓故事同知不與共國治僦屋桂  
林七年公署橫州時八寨躋躅道路為梗上督撫臣討  
之公復治軍興橫距田州千餘里富人子百計賂免寔

人輓芻粟病且死公一繩之法督有蘇無餉大集都御史郭公應聘御史李公東交上公功天子復賚之金橫守者至公去橫署太平橫人肖公像伏臘祀之

陳一定揭陽人嘉靖甲子舉人由瓊山學諭萬厯二年任懷集令課士日繼廩庖養老月輸金帛勤撫字緩催科修建學宮捐俸買置學田以贍士更多所創造培護風水育士愛民剔奸禦盜治懷五年陞同知懷人攀轅不忍別

孫世禎清平人萬厯初為桂平令清操簡默治化熙然  
內召工科給事中

黃雄揭陽人舉人萬厯三年知恭城縣精於吏事刻意  
節愛邑有桂林軍屯歲索耕丁禾數倍雄請以禾五百  
斤准糧壹石輸軍餘禾置社倉收貯備賑從之後以禾  
餉兵歲省官帑百金

伍可受清流人萬厯丁丑進士五年知容縣詳明縝密  
百廢頓興於學校尤有功十年擢南禮科

鄭成饒平人萬厯五年知永福縣時議條編新法人稱不便公上條陳便宜民安之

莊自勉曲靖人萬厯八年知永福縣宅心慈恕民有爭訟與處分而兩釋之政期不擾四境恬然時清丈田畝公訖以復額而止在任五年清勤備至陞任之日軍民留之不獲爭靴以注去思云

方思賢順德人舉人萬厯八年知昭平縣時邑甫平百度草創城垣雖建時多傾圯搖撞四出思賢日夜親自

督守鑿馬灘石築營繕公解學宮鋪逋公館次第告成  
北陀種黃璉寶等負固不服徵輸監司已議征剿思賢  
直抵其巢宣布德威璉寶等銜恩帖服即斂銀以完逋  
糧仍縛璉寶出見監司謝罪兵無血刃徭獍歸化拮据  
五載心勞神瘁遷蜀貳守而卒士民惜之

黃淙字仲文南海人萬厯十一年由舉人知平南縣興  
學校革吏弊民感其德有去思碑

周宗道廣東人萬厯十一年知岑溪縣時徭賊新平矢

心安撫減額徵置官騎建學宮興士類祠孝子丁蘭民  
厓向風卒于官民為立石祠祀

李曰孫惠州人舉鄉書萬厯十一年知蒼梧縣廉正明  
允減差役免災米修書院社學一時懷畏

蔡貴江西解元萬厯十三年知陽朔縣愛民下士百廢  
畢興

宋茂栢海陽人舉鄉書萬厯十四年知懷集縣善政得  
民以艱去遮道哭送立遺愛碑起補博白永樂不移復

丁艱家居一貧如洗

仇順方順德人以鄉薦萬厯十六年知容縣興學校行鄉約平里甲革坊廂不用操嚴一介有清苦之褒

薛應鐘晉江人萬厯中知桂平縣明敏通達有惠政時清丈新增秋糧花利幾二千石民甚不堪應鐘請豁為折色仍折半編差於國於民各不妨病歲計減銀六百餘兩邑中叢弊皆為一清兩臺交薦卓異民立祠祀之童時明字醒余淳安人萬厯間知永淳縣修縣志巡阡

陌興學校凡不便於民者悉詳革之士民請祀名宦

林春茂閩縣人萬歷十三年由舉人知懷集縣值金鷲  
搖亂大肆鴟張公請兵剿平時詔清丈以懷足額力請  
免糧民艱食鹽請減額餉二百四十兩商民兩便徵文  
獻重修邑乘擢錦衣衛經歷

陳煥臨海人舉人萬歷間令懷集重學興文周貧濟乏  
除耗羨修陂塘盡力田畝家有蓋藏凡餽膳所須必同  
民間給值時議運官鹽公以懷民素不習舟楫懇為申

免遷彌勒知州士民立祠尸祝

李邦才鶴慶人萬歷乙卯舉人知懷集縣凡鹽課陋規  
河廠羨餘櫃頭加耗盡報院司秋毫無取值徭寇謝龍  
崖倡亂單騎入嘉崗營以計擒斬之懷賴以寧尋卒

任思宇繼野南充人由恩貢知恭城縣廉明仁惠軫念  
民艱萬歷間歲饑發穀賑濟不足請官帑往衡永告糴  
活民命以千百計在任五年無逋賦無冤獄尋遷桂林  
通判合邑繪像建祠祀之

譚虬字玉潛新會人萬厯間由選貢知恭城縣政多仁恕凡民間疾苦每朔望進諸生詳詢其狀會歲大饑設釜萬壽寺捐俸煮羹粥活民命千餘

劉邦徵萬厯丁未知荔波縣比至邑檄諸蠻於前推誠撫諭蠻為懼伏白上官請置縣治於喇軫村歷任數年蠻終不敢蓄異志百姓思之

曾莘六合人以歲薦入太學萬厯二十五年知岑溪縣時寇方平瘡痍未起綏撫懷來戶口繁息拓新城移官

去岑人擁道留之

劉炁南昌人舉鄉書萬厯二十七年知藤縣政崇簡易與民休息捐俸建學稅璫起藤濠二江稅於五屯採金四境洵炁贊太守凌嗣音力爭稅璫查盤行縣炁強項不屈

聶鉉豐城人萬厯二十七年知永福縣見永邑差繁賦重百姓逋亡詳請撫院楊芳題允立碑每石糧減三徵七通邑世食其福

甯烈南平人萬厯間知興業縣有惠政士民德之去之日脫靴留跡立石誌思

余孟學江夏人萬厯間知興業縣廉能卓異賑恤饑民和處鄉士澤及青衿陞任去民攀送窮日不得出境

王之臣蘄州人舉人萬厯二十九年知陽朔縣存心愛人興利除害卓有政聲

朱大德鄱陽人萬厯三十年知永福縣宅心公恕政尚廉平民有爭訟每勸諭之使息學校壇署皆所修建捐

俸濟貧諫恭下士士民愛之卒於官

蔣一葵字仲舒武進人舉人萬歷中知靈川縣時徭夸  
政刺而土著渠魁構煽其間一葵廉得主名置之法而  
脇從餘黨單騎喻以朝廷威德正疆界別直枉今情遂  
定

李茂蓉新會人舉人萬歷四十一年知陽朔縣勞心撫  
字平易近人

湯師頊新貴人舉人萬歷二十五年永福教諭嚴正端

方勤月課振斯文賞勵頻施人知愧憤自後永士賢書  
屢登公之力也

林武莛晉江人萬厯中守備五山值府江徭亂王師入  
剿度賊必走平南檄武莛率兵邀擊時花相山徭反側  
與府江相應武莛單騎往撫所在悅服遂成破竹之勢  
以日夜衝瘴走三百里卒時甚惜之

王瑞黃巖人起家南丹千戶以功累擢永寧叅將會陽  
朔荔浦羣蠻馮險負固久攻不下軍門郭公應聘檄偏

師夾剿諸寇悉平由間道疾趨理定上宋諸巢空其穴  
所撫殘獍累累負鍤納鉅百餘年所未睹河池唏咳諸  
洞殺人禦貨與北三相表裏吳公文華檄瑞署思吉以  
便經略乃謀兵憲吳公善決策討之率勁兵擣唏咳若  
逡巡班師者而北三傾我兵寡途遠弛不為備竟薄之  
奪其險殲焉方論功而瑞死矣

賀萬祚嘉興人天啟中右江分守值龍山倡亂戕殺守  
帥王師入討監軍繼歿時事洶洶雖殲厥渠魁猶多反

側公鎮靜安攘條為善後六議皆懲疢補苴大計至今攸賴崇祀以報德焉

葛中選雲南河西人天啟初知思恩府撫綏有道士司率服更善聲詩加陞副使奉旨留任節制土司五年改府江兵巡道

梁子璠南海人進士天啟三年知蒼梧縣逐積蠹革陋規凡病民者悉請裁省修築城樓作興學校院司委理梧廠推稅收正額外毫不自潤後入為御史以論事廷

杖謫戍尋放還卒悟民建祠祀之

鄭圭仁和人歲貢天啟間知平樂縣蒞任七載撫字催科俱有方法捐鹽羨以助遼餉積公餘以造浮橋堂無爭訟之譁野無追呼之擾擢州守去士民攀轅不獲作迎年亭以寄思慕焉

趙啟文鶴慶人天啟四年知陽朔縣清介自持不久卒於任士民哀之

林贊福建人進士崇禎十年廣西左布政擢都御史巡

撫廣西值楚寇數萬入境圍全州人情震動公靜鎮省  
城修練固圉檄狼兵廖奇等數千赴全授密計破之全  
賴以安獻寇不敢窺粵皆公守禦功也

朱國玘嚴州人崇禎間知思恩府致治保民有濟世才  
十六年隆安縣土賊馬日仙身挾妖術惑衆自稱齊天  
大王建元太平橫肆猖獗本年四月日仙率衆犯思恩  
四野流離人心惶懼玘乃畫計如神分遣官兵奇正互  
用一戰而擒日仙餘氛悉行掃蕩民賴以安郡人刻碑

頌其功

黃景明晉江人崇禎甲戌進士十四年以禮部郎遷廣西督學時文風浮靡公毅然以挽頽為任下車頒示諸生習經史古文有能以古文行帖括者輒置高等以此博古相尚人文為之一變

謝君惠將樂人萬厯庚子舉人四十四年知懷集縣修學宮建文昌書院為治振刷糾紛奸不能眩有謝青天之譽擢刑曹復以郎中崇禎二年出守梧州清風尤著

王國相山西人舉人崇禎三年知全州廉介澹泊盡革  
錢糧耗羨勸民息訟尤勸學重士政暇講學諄諄如父  
兄告誡子弟有青天慈父之頌陞任去民祀之

汪起英字才仲休寧人萬曆癸卯舉於鄉崇禎間累官  
思明府同知地鄰交趾郡守世土官公因俗制宜以義  
禮浸溉之官民胥悅交人修貢有加以勞瘁卒于官祀

名宦

先曾伯祖由應城令歷官南京刑部主事左遷廣  
東高州別駕陞廣西思明郡丞康熙丙寅先伯兄

晚菴亦任高州別駕以勞卒於官余遠赴其地經紀櫬  
歸庚辰余以桂林別駕奉調太平亦曾權同知思明余

兄弟皆歷曹伯祖之舊治詢之士人子孫咸有能追述前朝遺政者荒徼散秩先後亦似有數存焉因識數語於後

董克正合州人崇禎間知陸川縣時際風鶴且兼饑饉公勸課農桑化倡孝弟署北流興業兩縣剿賊有功三邑士民均沾利賴陞辰州同知

申翀號月巖祁陽人進士崇禎間知荔波縣清正臨民愛士興學士民思之

粵西文載卷六十六